


# Eagle

## Antes →



Si bo mencioná 'Eagle', bo ta pensa mesora riba e barío entre Punta Brabo y Manchebo. Pero ta desde cu Arend Petroleum Maatschappij a establecé na Aruba e lugar ey a wordo jamá asina. Aínda nos conocé Arendstraat, cu ta e caya cu tabata conduci na e refinaría. Den e caya aki tabata tin e porta principal di e refinaría. Arend ta hulandes pa Eagle, cu ta na ingles. E nomber Arend mes ta traducí di e Compañía Mexicana de Petróleo 'El Aguila' S.A.

Eagle tabata un refinaría chikito establecí na 1927 y tabata forma un parti independiente di Koninklijke Shell na Corsouw. Un año despues, na 1928, promé cu Lago a cuminsa refiná crudo, ya Arend Petroleum Maatschappij tabata producí 3000 bari di azeta refiná pa día.

Dia 14 di Juni 1928 e prome azeta refiná na Aruba pa Arend Petroleum Maatschappij a wordo exportá. E barco cu a transportá e producto aki tabata San Gerardo cu a hiba e azeta aki pa Argentina.

Durante decada 30 e Compañía Arend a florecé. Na año 1935 tabata tin mas o menos 400 hende den servicio. E refinaría tabata traha solamente cierto productonan di e azeta.

Cu comienzo di Segunda Guerra Mundial e produccion a cuminsa baha. Paísnan den guerra tabata pidi gran cantidad di gasolin pa avion y esey no tabata den e specialidadnan di Arend Petroleum Maatschappij, pero si di Curacao Petroleum Industrie Maatschappij (C.P.I.M.) of Shell na Corsouw. Door di esaki mayoria di e empleadonan di Arend a bai traha na e refinaría C.P.I.M., pasobra e refinaría mester a producí hopi mas gasolin.

Pesey for di 1942 te cu 1945 trabaonan di refinacion den Arend Petroleum Maatschappij a para. Den e temporada aki e tankinan bashi a sirbi pa warda azeta pa C.P.I.M. y pa Lago. Despues di guerra tur trabao a sigui na Eagle, pero solamente pa dos año.

Na fin di 1952 tur trabao a para definitivamente y poco-poco tur tanki y otro construccionnan a wordo desmantelá.

Awor Eagle ta un barío residencial. No por nota nada mas cu antes ey tabata tin un compañía cu a refiná e prome crudo na Aruba y e promé cu a exporté como azeta for di Aruba!

ICH

## ← Awor







# CHABALITO

Number 3 - Año 2 - November, 1999 - Afl. 2,=

